

**Kræftimik nappaateqarnerup paasineqarnerata kingorna ullut 28-t qaangiutsinnagit kræfteqartut katsorsarneqarnissamut tamarmik pilersaarusiunneqartarnissaat qanoq qulakkeerneqarsinnaanersoq kingusinnerpaamik ulloq 1. november 2019-mi qulaajaqqullugu Naalakkersuisut peqquneqarnissaanik Inatsisartut aalajangiiffigisassaattut siunnersuut. Tamatumani nunatsinni kræfteqarlutik toqusartut ikilisinneqarnissaannik anguniagaqarnerup anguneqarnissaa siunertarineqarluni.**

(Inatsisartunut ilaasortat Stine Egede aamma Sofia Geisler, Inuit Ataqtigiit)

**Nappaassuarmik Kræftimik eqqugaasimalluni paasineqarnermiit sivisunerpaamik ullut 30-vit qaangiutsinnagit katsorsarneqarnerup aallartereersimasarnissaanik qularnaarussisoqartalernissaa qanoq iliorluni piviusunnngortinneqarsinnaanersoq pillugu misissueqqissaarinermik ukioq 2019 naatsinnagu Naalakkersuisut saqqumiusseqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartuni Siumup gruppiani ilaasortat)

### **Akissuteqaat**

(Peqqissutsimut, Isumaginninnermut Inatsisinullu Atuutsitsinnermut Naalakkersuisoq)

### **Aappassaaneerneqarnera**

Aalajangiiffigisassatut siunnersuutit suliarinerannut atatillugu Ilaqutariinnermut Peqqissutsumullu ataatsimiititaliap sulilluarsimanera pillugu Naalakkersuisut qujapput.

Ataatsimiititaliap allannguutissatut siunnersuutit saqqummiunneqartup akuerineqarnissaanik, siullertullu siunnersuutip itigartinneqarnissaanik, inassuteqarnera Naalakkersuisut naammagisimaarpaat. Naalakkersuisut maluginiarpaat ataatsimiititaliap oqaatigimmassuk suliassat nutaat piffissaq eqqarsaatigalugu salliunneqartut pissutigalugit suliassat allat tunulliunneqartariaqarnerat. Tamatuma saniatigut ataatsimiititaliap oqaaseqaatai allat Naalakkersuisunit tusaatissatut tiguneqarput.

Taamatut Naalakkersuisut naatsumik oqaaseqarlutik siunnersuutip akuersissutigineqarnissaa inassutigaat.